



B

B

Darnach mach das. c. also in sein fierung / zeuch ein zwerch lini. e. f. mitten durch die fierung / vnd setz ein puncten. i. mitten auf die lini. e. f. darausz reys ein cirkelriß der die vier seyten der fierung. a. b. c. d. an rür. darnach setz den vnferuckten cirkel auf der lini. e. f. so weyt hinder das. i. so breyt des bustaben grösser strich ist in einem puncten. k. vnd reys auch einen cirkelriß mit herumb der streicht ober die lini. b. d. vnd gibt foren dem bustaben in der rundung sein rechte dickē. Darnach reys ein aufrechte lini. g. h. ein zehenteyl von. b. d. herfür diser strich schneydet ab oben vñ vnden disen bustaben. c. wie das die alten gebraucht habē. aber hie will ich das vnder im mittel zwischen. g. h. vñ d. b. d. abschneyden. Darnach zeuch innerhalb des bustaben von der hand oben vnd vnden da die zwen cirkel durch einander lauffen die runden des dünneren strichs am bustaben solkomen / vñ zeuch auch an den selben orten die rundung ob vnd vnderhalb des bustaben an die seyten der fierung. a. b. vñ d. c. d. aber vnden da d' bustab. g. h. furdrut / da zeuch die gestalt des bustabē vnder der cirkellini ein wenig ein gebogner / vnd das er doch pey der spitz mit seinem end die cirkellini weyter rür / des gleychen nym das ober teyl inwendig auch ein wenig holer auß dann das der cirkelriß gibt / also geben die zwo cirkel lini schier alle gestalt des bustaben.

Zum anderen mal mach das. c. also reys in der fierung ein Diameter. c. b. vnd setz ein cirkel mit dem ein fues in den puncten. i. vnd reys mit dem anderen fues den eusseren cirkel rys wie vor / vñ laß in ober enden an dem Diameter. c. b. vnd vnden laß die cirkellini ein wenig weyter streycken dann vor. Darnach setz den vnueruckten cirkel mit dem ein fues ob dem. i. so breyt des bustaben zug ist auf den Diameter / vnd reys mit dem anderen fues den inneren cirkel / so gibt sich der zug nach der federen vnder breyter dann oben. Darnach zeuch das ander mit der hand / vnd die abschnit der end am bustaben seine oben für sich / vud vnden vnder sich. Wie ich den hernach hab auf gerissen.



R iij